

ጳውሎስ ኤፌሶና አሳስ ፃፊዳ ኪታ ጋሳ ቆፋ

ጳውሎስ ኤፌሶናን ዳዒያ አሳስ ፃፊዳ ኪታን ኡባሬ አሉዲ ፃሊዳባይ፡ «ዎዴይ ጋኪያ ዎዴ ያሳይ ፖላናው ቆፒዳ ቆፋይ፡ ሳሎኒኔ ሳባን ዳዒያ ሜዴቴላ ኡባይ ኪሪስቶሳፔ ጋርሳን ጊዳና ማላሳ» ያጊያ ቆፋ (1:10)። ሄሳ ቦላ ጉጂዲ ዬሱስ ኪሪስቶሳራ ዳዒያ ኢሲፊቴላን፡ አሳ ዜሬላ ኡባይ ኢሲኖ ጊዳና ማላ ሃ ጊታ ቆፋ ኦሶን ፔሻና ማላ ያሳ አሳ ሃሳዪሴስ።

ኤፌሶና ኪታ ኮይሮ ኪፊሊያን ፃፊይ ካራ ቆፋ ጊዲዳ ኢሲፊቴላባ ፃፋናው ደሚዳይሳ ዳልጊሲዲ፡ ያሳ አዋይ ባ አሳ ዋቲ ዶሪዳኮ፡ ኤንቲካ ኢያ ናባ፡ ዬሱስ ኪሪስቶሳን ባንታ ናጋራፔ ማርታ ዳሚዲ ዋኒዲ ላባ ኬዪዳኮኔ፡ ያሳ ጊታ ኡፋይሳ ቃላይ ጌሻ አያና ባጋራ ቱማ ጊዳይሲ ኤሬቲዳኮ ኦዴስ። ናምባንሉ ኪፊሊያን ቃሲ ፃፊይ ሃ ኪታ ናባቢያ አሳይ ባንታ ኢሲፊቴላ ዴዑዋን ኪሪስቶሳን ኤንታው ዳዒያ ኢሲፊቴላይ ቱማ ጊዳና ማላ ኤንቲ ዋኒዲ ዳናው ቤሲያኮ ቆፊሴስ።

አሳይ ኪሪስቶሳን ዳዒያ ኢሲፊቴላ ዋኒዲ ዳናው ቤሲያኮ ዲማ ዲማ ሌሚሶን ቆንጨሰ። ዎሳ ኬላ አሳቴላ ሌሚሶ ጊዲያ ዎዴ ኪሪስቶሲ ሄ አሳቴላሰ ሁዔ። ዎሳ ኬላ ጊምቤ ኬላን ሌሚሴቲያ ዎዴ ኪሪስቶሲ ሄ ኬላ ጎዳ ፃጹዋ ሚንሊያ ዋና ሹቻ። ዎሳ ኬላ ማቺን ሌሚሴቲያ ዎዴ ኪሪስቶሲ አዚናን ሌሚሴቲስ። ፃፊይ ኪሪስቶሳ ባጋራ ቆንጨዳ ያሳ አጾ ኬሃቴላ ዳሮ ናሺዲ ኦዲሼ፡ ጊዳይ ጨዋቲያ ሃሳያ ሃሳዬስ። ኢ ኡባባ፡ ኪሪስቶሳ ሰቁዋ፡ ኢያ ያርሼቴላ፡ ኢ ኢሚዳ ናጋራ አቶቴላ፡ ኢያ አጾ ኬሃቴላኔ ኢያ ጌሻቴላ ባጋራ ፃሊስ።

ኤፌሶና ኪታ አይፌ ቆፋታ

- ሳርሶ 1:1-2
- ኪሪስቶሳኔ ዎሳ ኬላ 1:3-3:21
- ኪሪስቶሳን ዳዒያ ኦራላ ዴዑዋ 4:1-6:20
- ኩሻ ቆፋ 6:21-24

1 ያሳ ሹኔን ኪሪስቶሳስ ዬሱሳ ሃዋሬ ጊዲዳ ጳውሎሳፔ፡ ኤፌሶናን ዳዒያ ጌሻታሲኔ ኪሪስቶሳስ ዬሱሳ አማኔይሳታሰ ፃፊቲዳ

ኪታ።

² ጾሳ ኑ አዋፔኔ ጎዳ ዬሱስ ኪሪስቶሳፔ አጾ ኬሃቴላይኔ ሳሮቴላይ ሂንቴው ጊድ።

ኪሪስቶሳን ዳዒያ አያና አንጂዋ

³ ሳሎን ዳዒያ አያና አንጂ ኡባን ኪሪስቶሳ ባጋራ ኑና አንጂዳ፣ ኑ ጎዳ ዬሱስ ኪሪስቶሳ አዋይ፣ ጾሳይ ጋላቴቶ። ⁴ ኑኒ ኢያ ሲንላን ጌሻታኔ ቦሬይ ባይናይሳታ ጊዳና ሜላ ጾሳይ አላሚይ ሜዴታናፔ ካሴ ኪሪስቶሳ ባጋራ ባ ሲቁዋን ኑና ደሪስ። ⁵ ጾሳይ ባ ሼኒያን ባ ደሲዳይሳዳ ዬሱስ ኪሪስቶሳ ባጋራ ኑና ባ ናይታ አላናው ካሴቲዲ ቆፒ ዋሊስ። ⁶ ጾሳይ ባ ሲቁያ ናና ባጋራ ኑስ ጮ አሚዳ አጾ ኬሃቴላይ ቦንቸታና ሜላ ሃሳ ኦሊስ።

⁷ ጾሳ አጾ ኬሃቴላ ዲሬቴላዳ ኪሪስቶሳ ሱላን ዋዜቲዲ ናጋራ አቶቴላ ዳሚዳ። ⁸ ባ አጾ ኬሃቴላ ጨንጫቴላኒኔ ኤራቴላን ኩንሊዲ ኑስ አሚስ። ⁹ ጾሳይ ባ ደሲዳይሳዳ ኪሪስቶሳ ባጋራ ኢያ ሼኒያ ፀራ ኑ ኤራና ሜላ ኦሊስ። ¹⁰ ዋዴይ ጋኪያ ዋዴ ጾሳይ ፖላናው ቆፒዳ ቆፋይ፣ ሳሎኒኔ ሳባን ዳዒያ ሜዴቴላ ኡባይ ኪሪስቶሳፔ ጋርሳን ጊዳና ሚላሳ።

¹¹ ኡባባ ባ ሼኒያዳ ኦሊያ ጾሳይ፣ ካሴቲዲ ባ ቆፒ ዋሊዳይሳዳ ኪሪስቶሳ ባጋራ ኑኒ ኢያባ ጊዳና ሜላ ኑና ደሪስ። ¹² ሃሳ ኢ ኦሊዳይ፣ ኪሪስቶሳን ኡፋይሲ ዋሊዲ ናጎን ኮይሮ ጊዲዳ ኑኒ ጾሳ ቦንቸዋ ጋላታን ቆንጨሳና ሚላሳ። ¹³ ሂንቴካ ሂንቴ አቶቴላ ዋንጌላ፣ ሄሲካ ቱማ ቃላ ሲዒዳ ዋዴ ኪሪስቶሳ አሚኒዴታ። ጾሳይ ሂንቴው አማና ጊዳ ጌሻ አያናን ሂንቴ አታሜቲዴታ። ¹⁴ ጾሳ ቦንቸይ ጋላቴታና ሜላ ጾሳይ ባ አሳ ዋዛና ጋካናው ጌሻ አያና ኑስ ኦይሉ ኦሊዲ አሚስ።

ጳጢሎሳ ዋሳ

¹⁵ ሃሳ ጊሾ፣ ጎዳ ዬሱሳ ሂንቴ አማኔይሳኔ ጌሻታ ኡባ ሂንቴ ሲቁይሳ ታ ሲዒዳ ዋዴ ¹⁶ ታ ዋሳን ሂንቴና ቆፓሼ ሂንቴ ጊሾ ጾሳ ጋላቴይሳ አጋቢኬ። ¹⁷ ጎዳ ዬሱስ ኪሪስቶሳ ጾሳይ፣ ቦንቸ አዋይ፣ ጾሳ ሂንቴ አሊ ኤራናዳ ጨንጫቴላኔ ቆንጨላ አያና ሂንቴው አማናዳ ታኒ ጾሳ ዋሳይስ። ¹⁸ ጾሳይ ሂንቴና ጂጊዳ ኡፋይሳይኔ ጌሻቲ ላቲያ ቦንቸ ላታይ አይ ሜላ ዳሮኮ ሂንቴ ኤራና ሜላ ጾሳይ ሂንቴ ዋዛና አይፊያ ዳናና ሜላ ታኒ ጾሳ ዋሳይስ።

¹⁹ ቃሲ ኢያ አሚኒያ ኑናን ኦሊያ ኢያ ዋልቃይ አይ ሜላ አዲዳ ጊቴኮ ሂንቴ ኤራና ሜላ ዋሳይስ። ሄ ዋልቃይ ጾኑቶናኔ

ደቡብና ወልቃ። ሃ ኑናን ደዒዲ ኦሊያ ወልቃይ። 20 ከሪስቶሳ ሃይቆፔ ደንሊዲ፣ ሳሎን ያሳፌ ኡቫቻ ባጋራ ኡቲሲዲ ገታ ወልቃይ ኢሲኖ። 21 ኢያ ሱንላይ፣ ኣይሴይሳታፔ ከግታ ኣዋታፔ፣ ሃሪይሳታፔ ኅዳታፔ፣ ቦላ ገዲዲ ሃ ኣላሚያ ፃላላን ገደናሺን ሲንሳፌ ያና ኣላሚያንካ ሃራ ሱንሳታ ኡባፌ ጶቃ። 22 ያሳይ ኡባ ከሪስቶሳ ቶሁዋፔ ጋርሳን ሃሪሲሰ፤ ቃሲ ዋሳ ኬላን ኡባባን ጎዳ ገደና ሜላ ኢያ ሹሚስ። 23 ዋሳ ኬላይ ከሪስቶሳ ኩሜሊ ኦሊያ ኢያ ኣሳቲላ። ሜጴቲላይ ደዒያ ቤሳ ኡባን ከሪስቶሲ ባ ሁዒን ኡባባ ኩንሌይሳ።

2

ከሪስቶሳን ሃይቆፔ ደዎ ፒኔላ

1 ሃይሳፌ ካሴ ሂንቲ፣ ሂንቲ ናጋራኔ ሂንቲ ቆሁዋ ጋሶን ሃይቆዳይሳታ። 2 ሄ ወደ ሂንቲ ሃ ኣላሚያ ኢታ ኦጊያ ካሊዳታ። ጫርኩዋ ቦላ ደዒያ ኣያና ወልቃታ ሃላቃሲኔ ሃላካ ያሳሰ ከቲቶና ኣሳ ሃሪያ ኣያናሰ ከቲቲዳታ። 3 ኑ ኡባይካ ካሴ ሄ ኣሳታ ገደን ኑ ኣሾ ኣሙዋኔ ኑ ወዛና ሺኒያ ካሊዲ ደዒዳ። ኑካ ሃራታ ሜላ ኑ ሜጴቲላን ያሳ ሃንቁዋ ኤካናው ደዒይሳታ።

4 ሺን ያሳ ገታ ማሮቲላፌኔ ኑስ ደዒያ ገታ ሲቁዋፔ ደንዲዳይሳን፣ 5 ሃሪ ኣቶሺን ኑኒ ኑ ቆሁዋን ሃይቆዲ ደዒሺን ከሪስቶሳ ባጋራ ኑስ ደዎ ኢሚስ። ሂንቲካ ኣቲዳይ ያሳ ኣጶ ኬሃቲላና። 6 ያሳይ ኑና ከሪስቶሳራ ኢሲፌ ሃይቆፔ ደንሊዲ ሳሎ ሲሁዋን ኢያራ ኢሲፌ ዋሊስ። 7 ኢ ሃሳ ኦሊዳይ፣ ከሪስቶሰ ዩሱሳ ባጋራ ኑስ ቆንጨሲዳ ባ ኬሃቲላኔ ዛዊ ባይና ባ ኣጶ ኬሃቲላ ዲሬቲላ ያና ላይላን ኑና ቤሳናሳ። 8 ሂንቲ ኣጶ ኬሃቲላን ኣማኖን ኣቲዳታ። ሄሲካ፣ ያሳ ኣሞታፔ ኣቲን ሂንቲ ኦሶን ቤንቲዳባ ገደና። 9 ኦኒካ ጩቁቶና ሜላ ኣቶቲላይ ቤንቲዳይ ኦሶን ገደና። 10 ኑኒ ያሳ ሜጴቲላ፤ ኢ ኑስ ካሴቲዲ ገረሲ ዋሊዳ ሎዎ ኦሶታ ኦላና ሜላ ከሪስቶሰ ዩሱሳ ባጋራ ኦራሊ ሜጴቲዳ።

ከሪስቶሳራ ደዒያ ኢሲፌቲላ

11 ሃሳ ገሹ፣ ሂንቲኖ ዩሌታን ኣይሁዳ ገደናይሳቶ፣ ኣይሁዳቲ ባንታው ኣሳ ኩሺን ቃፃሬቲዲ፣ ሂንቲና ቃሲ ቃፃሬቲቦናይሳታ ገዲ ጭይሳ ኣክኪቲ። 12 ሄ ወደ ሂንቲ ከሪስቶሳፔ ሻኬቲ ደዒዳይሳ፣ ኢሰራዔሌ ኣሳሰ ኣላጋ ገዲዲ ደዒዳይሳ፣ ያሳ ኡፋይሳ ቃላፔ ሃኪዲ ደዒዳይሳኔ ሃ ኣላሚያን ኡፋይሲኔ ያሲ ባይና ደዒዳይሳ

1:20 ማዘ 110:1 1:22 ማዘ 8:6፤ ቆላ 1:22-23፤ 1:18 2:1 ቆላ 2:13

አክኪቱ። 13 ሺን ሂንቴ ካሴ ሃኪዲ ዳዒዳይሳቲ፣ ሃዒ ኪሪሰቶስ ዩሱሳን ዳዒዲ ኪሪሰቶሳ ሱላን ማታ ሺቂዳታ።

14 ኪሪሰቶሱ ኑ ሳርቴላ፤ ኢ ኣይሁዳኔ ኣይሁዳ ጊደና ኣሳ ቲሚዲ፣ ናምዓ ሻኪ ዋሊዳ ሞርኬቴላ ጎዳ ላሊሰ። 15 ኢ ባናን ሃ ናምዑ ዛሬታፔ ኢሲ ኦራላ ኣሴ ሜዲዲ፣ ሂጊያ ኢያ ኪታራኔ ዋጋታራ ኢሲፌ ባ ኣሳቴላን ዳይሲዲ ሳርቴላ ኣሚሰ።

16 ኪሪሰቶሱ ማሰቃሊያ ቦላ ሃይቂዲ ሞርኬቴላ ዳይሲሰ፤ ቃሲ ናምዑ ዛሬታ ኢሲ ኣሳቴላ ኦሊዲ ያሳራ ሲጌሊሰ። 17 ኪሪሰቶሱ ዪዲ፣ ያሳፌ ሃኪዲ ዳዒያ ሂንቴው፣ ቃሲ ማቲዲ ዳዒያ ኤንታው ሳርቴላ ዋንጌላ ኦዲሰ። 18 ኑ ኡባይ ኢያ ባጋራ ኢሲ ኣያናን ኣዋ ሲንጼ ሺቃናው ዳንዳዖስ።

19 ሂዛፔ ሂንቴ ኣላጋ ዋይኮ ኢማጼ ጊዳኬታ፣ ሺን ሂንቴ ሃዒ ጌሻታ ቢታ ኣሴኔ ያሳ ሶ ኣሲ። 20 ሂንቴ ሃዋሬቲኔ ናቤቲ ባሲዳ ባሱዋ ቦላ ኬፃቲዳታ። ጎዳ ፃጶዋ ሚንሊያ ሹቻይ ኪሪሰቶስ ዩሱሳ። 21 ኢያን ኬላ ኡባይ ኢሲፌ ኦይኬቲዲ ጎዳን ጌሻ ያሳ ኬላ ጊደናው ዲጩሰ። 22 ሂንቴ ቃሲ ያሳይ ባ ኣያናን ዳዒያ ኬላ ጊደናው ኪሪሰቶሳን ኢሲፌ ኬፃቲታ።

3

ኣይሁዳ ጊደና ኣሳሰ ሃዋሬ ጊዲዳ ጳዔሎሳ

1 ሄሳ ጊሾ፣ ታኒ፣ ጳዔሎሲ፣ ኣይሁዳ ጊደና ሂንቴ ጊሾ ኪሪሰቶስ ዩሱሳን ቃሾ ኣሲ ጊዳሰ። 2 ታ ሂንቴና ማዳና ሜላ ያሳይ ባ ኣጶ ኬሃቴላን ታው ኢሚዳ ሃ ኦሱዋባ ሂንቴ ሎይላ ሲዒዳታ። 3 ታ ሂንቴው ካሴ ቃንላን ፃፊዳይሳዳ ያሳይ ባ ፀራ ቆንጩላን ታው ቆንጩሲሰ። 4 ታ ፃፊዳይሳ ሂንቴ ናባቢያ ዋዳ ኪሪሰቶሳ ፀራ ታ ኣይ ሜላ ኤሪዳኮ ሂንቴ ኣኬካናው ዳንዳዒታ። 5 ሃ ፀራይ ጌሻ ሃዋሬታሲኔ ናቤታስ ሃዒ ኣያና ባጋራ ቆንጩዳይሳዳ ቤኒ ዋዳ ኣሳሰ ሄሳዳ ቆንጩሲቤና። 6 ፀራይ ሃይሳ፣ ኣይሁዳ ጊደና ኣሳይ ዋንጌላ ባጋራ ኢሰራዒሌታራ ኢሲፌ ያሳ ኣንጂዋ ላቶሶና። ኢሰራዒሌታራ ኢሲ ኬላ ኣሲ ጊደሶና፤ ኪሪሰቶስ ዩሱሳን ባጋራ ያሳ ኡፋይሳ ቃላ ኤኮሶና።

7 ያሳይ ባ ኦሊያ ዋልቃ ባጋራ ታው ኢሚዳ ኣጶ ኬሃቴላን ሃ ዋንጌላሰ ኦሳንቾ ጊዳሰ። 8 ታኒ ጌሻታ ኡባፌ ላፋ ጊዲኮካ ኣይሁዳ ጊደና ኣሳሰ ዛዋ ባይና ኪሪሰቶሳ ዲሬቴላ ዋንጌላ ኦዳና ሜላ ሃ ኣጶ ኬሃቴላይ ታው ኢሚቲስ። 9 ቃሲ ካሴ ዋዲያን

2:15 ቆላ 2:14 2:16 ቆላ 1:20 2:17 ኣሳ 57:19 3:4 ቆላ 1:26-27

ኡባ ሜዲያ ያሳን ቆሴቲዲ ዳዲያ ፀራሰ፣ ያሳ ቆፋይ ኣይቤኮ ቆንጩሳናው ኣጶ ኬሃቴላይ ታው ኢሚቲሰ። 10 ያሳይ ሄሳ ኦሊዲይ ሃዲ ዋዲያን ዋሳ ኬላ ባጋራ ሳሎ ሰሁዋን ዳዲያ ሃላቃታሲኔ ሃራይሳታሰ ባ ዲማ ዲማ ቆንጩላ ኤሪሳናሳ። 11 ያሳይ ባ ሚሪና ቆፋ ኑ ጎዳ ኪሪሰቶሰ ዬሱሳ ባጋራ ፖላናው ሄሳ ኦሊሰ። 12 ኑ ኣማኖን ያሽ ባይና ያሳኮ ሺቃና ሜላ ኪሪሰቶሲ ኑሰ ሚናቴሊኔ ላዓቴሊ ኢሚሰ።

13 ታኒ ሂንቴ ጊሾ ዋዬ ኤኪያ ጊሾ ሂንቴ ታ ዋያን ዬላቶናዳ ሂንቴና ዋሳይሰ፤ ታኒ ሂንቴ ቦንቹዋሰ ዋዬታይሰ።

ኤፌሶና ኣሳሰ ዋሴቲዳ ዋሳ

14 ታኒ ኣዋ ሲንሳን ጉልባታዳ ዋሴይ ሄሳ ጊሾሳ። 15 ሳሎኒኔ ሳዓን ዳዲያ ኢሲ ኢሲ ሶ ኣሳይ ኢያን ሱንጮቴሰ። 16 ያሳይ ባ ቦንቹ ዲሬቴላፊ ሂንቴ ጋርሳ ኣሳቴላ ሚንሊያ ዋልቃ ባ ኣያና ባጋራ ኢማና ሜላ ሂንቴው ዋሳይሰ። 17 ቃሲ ኣማኖን ኪሪሰቶሲ ሂንቴ ዋዛናን ዳና ሜላኔ ሂንቴ ሰቆን ፃጶ ዬዲዲ ሚኒዲ ዳና ሜላ ዋሳይሰ። 18 ሂሳዳካ፣ ኪሪሰቶሳ ሰቆይ ኣይ ሜላ ዳልጌኮ፣ ኣዲሴኮ፣ ጶቁኮኔ ጩዋኮ ጌሻታ ኡባራ ኤሪያ ዋልቃ ሂንቴ ኣኩካና ሜላ ዋሳይሰ። 19 ኤራቴላፊ ኣጲያ ኪሪሰቶሳ ሰቆዋ ሂንቴ ኤራና ሜላ ቃሲ ዳዎ ኢሚያ ያሳ ዋልቃን ሂንቴ ኩማና ሜላ ታ ዋሳይሰ።

20 ሂዛ፣ ኑ ጊደን ኦሊያ ባ ዋልቃ ባጋራ ኑኒ ዋሴይሳፊ ዋይኮ ቆቴይሳፊ ኣሊዲ ኦላናው ዳንዳዲያ ያሳሰ። 21 ዋሳ ኬላኒኔ ኪሪሰቶሰ ዬሱሳን ዋዴ ኡባን ሚሪናፔ ሚሪና ጋካናው ቦንቹይ ጊዶ። ኣሚንዒ።

4

ኪሪሰቶሳራ ዳዲያ ኢሲፊቴላ

1 ሂዛ፣ ጎዳ ጊሾ ቃሽቲዳ ታኒ፣ ሂንቴ ፃጌቲዳ ፃሳሰ ቤሲያ ዳዎ ዳና ሜላ ሂንቴና ዋሳይሰ። 2 ሂንቴ ኡባ ዋዴ ኣዳኔ ሃዮ ጊዳቲ፤ ኢሶይ ኢሱዋ ዳንዳዲቴኔ ሰቆን ዳዲቴ። 3 ሳርቴላን ቃሽቲዲ ኣያናይ ኢሚያ ኢሲፊቴላ ናጋናው ሚኒቲ። 4 ያሳይ ሂንቴና ፃጊዳ ዋዴ ኢሲ ኡፋይሳሰ ፃጊዳይሳዳ ኢሲ ኣሳቴሊኔ ኢሲ ኣያኒ ዳዴሰ። 5 ኢሲ ጎዳይ፣ ኢሲ ኣማኖይኔ ኢሲ ፃንቃቴይ ዳዴሰ። 6 ኡባፊ ቦላ ጊዲዳ፣ ኡባ ባጋራ ኦሊያኔ ኡባ ጊደን ዳዲያ ኢሲ ያሳይ፣ ኡባ ኣዋይ ዳዴሰ።

4:2 ቆላ 3:12-13

7 ሺን ከሪስቶስ ኢማናው ኮዩዳይሳዳ ኑ ኢሶይ ኢሶይ ዲማ ዲማ አሞታ ኤኪዳ። 8 ሄሳ ገሾ፣ ያሳ ቃላይ፡

«ኢ ፑዴ ኬዩዳ ዎዴ ዲዔቲዳ ዳርታ ባራ ኤኪዲ ቢሰ፤ አሳሰካ አሞታ አሚሰ»

ያጌሰ። 9 ያተን፣ «ፑዴ ኬዩሰ» ጉሳይ ዎይ ጉሴ? ኢ ኮይር ዲጌ፣ ሳሳ ዚቃ ቤሳ ዎጲሰ ጉሱ ጊደና አጻኮ አይ ጉሴ? 10 ሃ ዲጌ ዎጲዳይሲ፣ ኡባ ቤሳን ቤንታናው ኡባፌ ቶቃ ሳሉዎ ኬዩዳይሲ ኢያ።

11 ኢ ኢሶታ ኢሶታ ሃዎሬታ፣ ኢሶታ ኢሶታ ናቤታ፣ ኢሶታ ኢሶታ ዎንጌላ ሳባኬታ፣ ኢሶታ ኢሶታ ዎሳ ኬሌ ሄሚይሳታ፣ ኢሶታ ኢሶታ አሰታማሬታ ኦሌዲ አሚሰ። 12 ኢ ሄሳ ኦሌዳይ ከሪስቶሳ አሳቴሌ ጊዲዳ ዎሳ ኬሌ ዲቻናወኔ አማኒያ አሳ ያሳ ኦሶስ ገጊሳናሳ።

13 ሄሳዳካ፣ ኑ ኡባይ ያሳ ናሳ ኤሪዲ አማኖን ቤንቲያ ኢሲፌቴላኮ ጋኪዲ፣ ከሪስቶሳ አያና ዴዑዎ ኩሜላ ጋኪዲ ዲጫና ሜላሳ።

14 ሂዛፔ ጉዬ፣ አሳ ጌኔ ጨሞን ገጊዳ ባሌሌያ ዎርዶ ቲሚርቲ ጫርኮኒኔ ሆቤን ጌዴኔ ሃ ኩሎ ካዒያ ናይታ ሜላ ጊዳናው ቤሰና። 15 ሺን ኑኒ ቱማ ሲቆን ኦዲሾ አሳቴላሰ ሁዔ ጊዲያ ከሪስቶሳራ ዴዒያ ኢሲፌቴላ ጉጂ ጉጂ ዲቾሰ። 16 ኩሜላ አሳቴላይ ከሪስቶሳ ቦላ ዜምፔሰ ቃሲ ዲማ ዲማ አሳቴላ ቢለቲቲ ኢሶይ ኢሱዎራ ኦይኬቲዲ ኡቲሰ። ኢሲ ኢሲ አሳቴላ ከፊሌይ ባ ኦሱዎ ኦሌያ ዎዴ ኩሜላ አሳቴላይ ሲቆን ዲጩሰ።

ከሪስቶሳን ኦራላ ዴዎ

17 ሄሳ ገሾ፣ ታኒ ሃይሳ ሂንቲው ጎዳ ሱንላን ኦዳይሲኔ ማርካታይሰ። ጎዲ ባይና ቆፋ ቆጊያ አይሁዴ ጊደና አሳታዳ ዴዎጊቲ። 18 ኤንታ ቆፋይ ቆሚሰ፤ ባንታ ዎዛና ሙሚሲደሶና። ኤንቲ ኤራቴላ ጳዮኒኔ ኢፃሰ ጊዲ ያሳይ አሚያ ዴዑዎፔ ሃኪደሶና። 19 ኤንቲ ዬላ ጊያባ ኤርኮና፤ ኤንቲ ላይማቴላሰ ባንታና አሌ አሚደሶና፤ ቃሲ ቱናባ ኡባ ጉዬ ጎና ኦሶሶና።

20 ሺን ሂንቲ ከሪስቶሳ ኤሪዳይ ሄሳ ሜላ ኦጌን ጊደና። 21 ኢያባ ቱማ ሲዲዴታ። ቃሲ ዬሱሳን ዴዒያ ቱማ ሜላ ኢያፔ ታማሪዴታ። 22 ሂንቲ ካሴ ዴዒያ ዴዎ ኦጊያ ኣጊቲ። ቃሲ ባ ጨሚያ አሞን ጳያ ሂንቲ ጨጋ አሳቴላ ዲጊቲ። 23 ሂንቲ ዎዛና ቆፋን ኦራዲቲ። 24 ቱማ ዒሎቴላኒኔ ጌሻቴላን ያሳ ለሚሶን ሜጴቲዳ ኦራላ አሳቴላ ማዒቲ።

4:8 ማዘ 68:18 4:16 ቆላ 2:19 4:22 ቆላ 3:9 4:24 ሜጴ 1:26፤ ቆላ 3:10

25 ሂዛ፣ ዋርዶ ኦዴቶፊቴ። ኩኒ ኡባይ ከሪሰቶሳ ኣሳቴላ ቢሊቴታ ጊዲያ ጊሾ ኣሳ ኡባራ ቱማ ኦዴቲቴ። 26 ሃንቁቲቴ፣ ሺን ሂንቴ ሃንቁቀን ናጋራ ኦሎፊቴ። ሂንቴ ሃንቁቲ ዴሲሺን ኣዊ ዉሎፎ። 27 ፃላሂስ ቤሴ ኢሞፊቴ። 28 ካይሲያ ኡራይ ሂዛ፣ ጉዬ ካይሶቶፖ። ሺን ማንቆታ ማዲያባይ ኢያው ዳና ማላ ባ ኩሺን ሎዖባ ኦሎ።

29 ሂንቴ ደናፔ ኢታ ቃሊ ኬዮፖ። ሺን ሲዔይሳታ ጎዳና ማላኔ ሃራታ ማንሌሌያ ኮሺያ ሎዖ ቃሊ ሂንቴ ደናፔ ኬዮ። 30 ያሳይ ሂንቴና ዋዚያ ጋላሳስ ሂንቴና ኣታሚዲ ዋሊዳ ያሳ ኣያና ኣዛንሶፊቴ። 31 ጫማቴላ፣ ዪሎ፣ ሃንቆ፣ ዋሶ፣ ጫሺኔ ኢታ ኡባ ሂንቴፊ ሃሲቴ። 32 ኣሊዲ ኢሶይ ኢሱዋስ ኬሃን ቃዴቴይሳታ ጊዲቴ። ያሳይ ከሪሰቶሳ ባጋራ ሂንቴው ኣቶ ጊዲይሳዳ ሂንቴካ ዋሊስ ኣቶ ጊቴ።

5

1 ሂዛ፣ ያሳይ ደሲያ ናይታዳ ኢያ ዳኒቴ። 2 ከሪሰቶሲ ኩና ደሲዲ ባና ኩ ጊሾ ያሳስ ሳዊያ ኢሞኔ ያርሾ ኦሊዲ ኢሚዲይሳዳ ሂንቴካ ሲቆን ዴዒቴ።

3 ሺን ላይማቴላ፣ ቱናቴላኔ ኡዜቴላ ኣማኒያ ኣሳስ ቤሶና ጊሾ ሂንቴ ጊደን ኡባራካ ሲዔቶፎ። 4 ያሳ ጋላቲቴፔ ኣቲን ዬላያባይኔ ኤያ ኦዲ ዋይኮ ቁዴይ ሂንቴው ቤሶና ጊሾ ሂንቴ ጊደን ኡባካ ዴዖፖ። 5 ሃይሳ ኤሪቴ፤ ኦኒካ ላይማቴይ ዋይኮ ቱናባ ኦሊይ ዋይኮ ኡዜቴይ ከሪሰቶሳ ካዋቴላኔ ያሳ ካዋቴላ ላታናው ዳንዳዔና። ኡዜቴላ ኤቃ ጎይኖ ማላ።

6 ሃይሳታ ጋሶን ያሳ ሃንቆይ ከቴቶና ኣሳ ቦላ ያና ጊሾ ኦኒካ ሂንቴና ፓሶና ኦዳን ጨሞፎ። 7 ሄሳ ማላ ኣሳራ ኢሲፊቴላ ኦሎፊቴ። 8 ካሴ ሂንቴ ቋማን ዴዒዳታ፣ ሺን ሃዒ ጎዳ ባጋራ ፖዖን ዴዒታ። ሂዛ፣ ፖዖ ኣሳዳ ፖዖን ሲማሬቲቴ። 9 ፖዖይ ሎዖቴላ፣ ፂሎቴላኔ ቱማቴላ ኣይፊሰ።

10 ጎዳ ኡፋይሲያባ ኦላናው ኮዪቴ። 11 ጎዒ ባይና ቋማ ኦሶ ቆንጨሲቴፔ ኣቲን ኢያራ ኢሲፎፒቴ። 12 ኤንቴ ጌማን ኦሊያ ኦሱዋ ሃሪ ኣቶሺን ኦዳናዉካ ዬላዬሰ። 13 ሺን ኡባባይ ፖዖን ኬያ ዋዴ ቆንጨን ቤንቴሰ። 14 ፖዖይ ኡባባ ቆንጨን ቤሴሰ። ሄሳ ጊሾ፣

4:25 ዛካ 8:16 4:26 ማዝ 4:4 4:32 ቆላ 3:13 5:2 ኬሳ 29:18፤ ማዝ 40:6

«ኔኖ ጲስኬይሶ ባርካ፤
ሃይቆፕ ዴንዳ፤

ኪሪስቶስ ኔ ቦላ ፖሳና» ያጌተሰ።

15 ሃዛ፡ ሃንቴ ዋኒዲ ዳዒያኮ ኣኬኪ ቤዒቴ። ጨንጨታ ጊዲቴፕ ኣተን ኤያታ ጊዶፕቴ። 16 ላይላይ ኢታ ጊዲያ ጊሾ ኢንጃቴያ ዎዴ ኡባ ጎዔቴቴ። 17 ሃሳ ጊሾ፡ ጎዳ ሼኔይ ኣይቤኮ ኣኬኪቴፕ ኣተን ኤዮፕቴ።

18 ጌሻ ኣያናን ጋላስ ጋላስ ኩሚቴፕ ኣተን ጳዮኮ ሃንቴና ካሌሊያ ጊሾ ዎይኔ ኡሻን ማሉቶፊቴ። 19 ማዘሙሬን፡ ሳባኒኔ ኣያና ዬላን፡ ኢሶይ ኢሱዋራ ኦዴቴቴ። ቃሲ ሃንቴ ዎዛናን ዛማሪሼኔ ሳቢሼ ጎዳ ጋላቴቴ። 20 ኦ ጎዳ ዬሱስ ኪሪስቶሳ ሱንሳን ኡባ ዎዴ ያሳ ኣዋ ኡባባስ ጋላቴቴ።

21 ኪሪስቶሳ ቦንቐዋስ ጊዲ ኢሶይ ኢሱዋስ ሃሬቴቴ።

ኣዚናባኔ ማቐባ

22 ማቐቶ፡ ጎዳስ ሃሬቴይሳዳ ሃንቴ ኣዚናታስ ሃሬቴቴ።

23 ኪሪስቶሲ ዎሳ ኬላስ ሁዔ ጊዴይሳዳ ኣዚኒካ ባ ማቐስ ሁዔ። ቃሲ ኪሪስቶሲ ባ ኣሳቴሲ ጊዲዳ ዎሳ ኬላ ኣሽይሳ። 24 ሺን ዎሳ ኬላይ ኪሪስቶሳስ ሃሬቴይሳዳ ማቐቴ ባንታ ኣዚናታስ ኡባባን ሃሬታናው ቤሴስ።

25 ኣዚናቶ፡ ኪሪስቶሲ ዎሳ ኬላ ደሲዲ ባና ኢው ኢሚዳይሳዳ ሃንቴካ ሃንቴ ማቐታ ደሲቴ። 26 ኢ ዎሳ ኬላ ባ ቃላ ባጋራ ሃላን ሜጨዲ ጌሺስ። 27 ኪሪስቶሲ ዎሳ ኬላ ቂቴ ዎይኮ ሶምዎ ቱሲ ዎይኮ ሃሳ ሜላባይ ባይና ኢ ኩሜላ ቦንቐዋራ ጌሺኔ ቦራቶናሮ ኦሊዲ ባኮ ሺሻናው ኮዪዲ ሃሳ ኦሊስ። 28 ሃሳዳካ፡ ኣዚናቴ ባንታና ደሴይሳዳ ባንታ ማቐታ ደሳናው ቤሴስ። ባ ማቐው ደሴይሲ ባና ደሴስ። 29 ባና ኢጂያ ኣሲ ኦኒካ ባዋ፡ ሺን ኪሪስቶሲ ዎሳ ኬላስ ኦሌይሳዳ ባ ኣሳቴላ ሙኬሲኔ ናጌስ። 30 ኦኒ ኪሪስቶሳ ኣሳቴላ ቢሊቴታ።

31 ያሳ ቃላይ፡ «ሃሳ ጊሾ፡ ኣሲ ባ ኣዋኔ ባ ኣዪው ኣጊዲ፡ ባ ማቐራ ኢሲፊ ዳና፤ ኤንቴ ናምዓይካ ኢሲ ኣሾ ጊዳና» ያጌስ።

32 ሃይሲ ጌታ ፀራ፡ ሺን ታኒ ሃሳ ኪሪስቶሳባኔ ዎሳ ኬላባ ለሚሶ ኦላዳ ኦዳይስ። 33 ጊዶሺን፡ ሃንቴ ኢሶይ ኢሶይ ሃንቴ

ማቼታ ሂንቴ፣ ሂንቴና ዶሴይሳዳ ዶሲቴ። ኢሲ ኢሲ ማቻ ባ ኣዚና ቦንቻናው ቤሴስ።

6

ናይታባኔ ዩሊዳይሳታባ

1 ናይቶ፣ ሂንቴ ጎዳባ ገዲያ ገሾ ሂንቴና ዩሊዳይሳታሰ ኪቴቴቴ። ሄሲ ሂንቴው ቤሲያባ። 2 «ኔ ኣዩዉኔ ኔ ኣዋ ቦንቻ።» ሄሲ ኡፋይሳ ቃሊ ዳዒያ ኮይሮ ኪታ። 3 «ኔ ሄሳ ፖሊያባ ገዲኮ ኡባይ ኔው ኢንጃታና፤ ኔ ላይላይ ሳባ ቦላ ኣዲቃና።»

4 ኣዋቶ፣ ሂንቴ ናይታ ጎዳ ቃላ ታማርሶኒኔ ኤንታ ካሌሶን ዲቺቴፔ ኣቲን ኤንታና ጫሚሶፒቴ።

ጎዳታባኔ ኣይሌታባ

5 ኣይሌቶ፣ ኪሪሰቶሳሰ ኪቴቴይሳዳ ሂንቴ ሳባ ጎዳታሰ ያሻገን፣ ቦንቻኒኔ ሱሬ ዋዛናን ኪቴቴቴ። 6 ኤንታ ሲንላን ሳባ ዳማናው ኤንቲ ቤዒያ ዋዳ ፃላላ ኦሎፊቴ። ሺን ኪሪሰቶሳ ኣይሌታዳ ያሳ ሼኒያ ዋዛናፔ ፖሊቴ። 7 ኣሳሰ ገደናሺን ጎዳሰ ገዲ ሂንቴ ኩሜላ ዋዛናፔ ኦሊቴ። 8 ኣይሌ ገዲን ዋይኮ ጎዳ ገዲን ኢሶይ ኢሶይ ባ ኦሊዳ ሎዎ ኦሱዋሰ ጎዳፔ ዋይቶ ኤካናይሳ ኤሬታ።

9 ጎዳቶ፣ ኣሳ ሶዎዎ ቤዒዲ ማዶና ጎዳይ፣ ሳሉዋን ዳዒይሳ ኤሬታ። ሄሳ ገሾ፣ ሂንቴ ኣይሌታ ማንዴይሳ ኣገዲ ኤንቲ ሂንቴው ቦንቻን ኪቴቴይሳ ሜላ ሂንቴ ኤንታው ሎዎባ ኦሊቴ።

ያሳ ኦላ ሚሼታ

10 ዉርሴላን፣ ጎዳኒኔ ኢያ ገታ ዋልቃን ሚኒቴ። 11 ፃላሂ ጨሙዋ ኤቁታናው ዳንዳባና ሜላ ያሳይ ሂንቴው ኢሚዳ ኦላ ሚሼያ ኡባ ማዒቴ። 12 ኦ ኦላይ ኣሳራ ገደናሺን ሳሎን ዳዒያ ቱና ኣያና ኦላንቻታራ፣ ማታ ኣዋታራ፣ ሃሬይሳታራኔ ሃ ጵማ ኣላሚያ ዋልቃታራ።

13 ሄሳ ገሾ፣ ኢታ ጋላሳ ቱቃናዉኔ ኡባ ፖሊዲ፣ ሚኒዲ ኤቃናው ሂንቴ ዳንዳባና ሜላ ያሳ ኦላ ሚሼታ ኡባ ማዒቴ። 14-15 ቱማ ፃሳን ዳንጮዳ ዳንጨዲ፣ ፃሎቴላ ፀራራዳ ቲራን ዋሊዲ፣ ሳርቴላ ዋንጌላ ሂንቴ ቶሁዋን ጫማዳ ኣሊዲ ሚኒዲ ኤቁቴ። 16 ሄ ኡባፌ ኣሊዲ፣ ፃላሂይ ዩዲያ ላፂያ ታማ ደንጌ

6:1 ቆላ 3:20 6:2 ኬሳ 20:12፤ ዛሬ 5:16 6:4 ቆላ 3:21 6:5 ቆላ 3:22-25 6:9 ቆላ 4:1፤ ዛሬ 10:17፤ ቆላ 3:25 6:14-15 ኢሳ 11:5፤ ኢሳ 59:17፤ 52:7

ኡባ ቶይሳናው ዳንዳዊያ አማኑዋ ኡባ ዋዴ ጎንዳሌዳ ኦይኪቴ።
17 ያሳ አቶቴላ ቢራታ ባርኔፃዳ ሂንቴ ሁዔን ዋሊቴ፤ ቃሲ ጌሻ
አያና ማሻ፣ አካ ያሳ ቃላ ኦይኪቴ። 18 ዋሳ አጎፊቴ፤ ሃራታሰካ
ጋናቴቴ፤ ኡባ ዋዴ አያናን ዋሲቴ። ሄሳን፣ ጌሻታሰ ሳሌቶና ሚኒዲ
ኡባ ዋዴ ዋሲቴ።

19 ታኒ ዋንጌላ ፀራ ያሺ ባይና ቆንጨሳዳ ኦዳና ሜላ ያሳይ
ታው ቃላ አማና ሜላ ዋሲቴ። 20 ታኒ ሄሳ አላናው ኪቴታሰ
ሃዒካ ቃሻን ዴዔይ ሄ ዋንጌላ ጊሻሳ። ያኒያ ጊሻ፣ ታኒ ያሺ
ባይና ቤሴይሳዳ ኦዳና ሜላ ታው ዋሲቴ።

ወርሴላ ሳርሳ

21 ታኒ ዋና ዴዒያኮኔ አይ ኦሊያኮ ሂንቴ ኤራና ሜላ ኑ ሲቆ
አሻይ፣ ጎዳ ኦሱዋን አማኔቴዳ ኦሳንቸይ፣ ቴኪቆሲ፣ ታባ ኡባ
ሂንቴው ኦዳና። 22 ኑኒ ኡባይ ዋኒዲ ዴዒያኮ ሂንቴው ኦዳና
ሜላኔ ሂንቴና ሚንፊላና ሜላ ታኒ አያ ሂንቴኮ ኪታሰ።

23 ያሳ አዋፔ፣ ጎዳ ዩሱሰ ኪሪሰቶሳፔ ሳርቴላይኔ ሲቆይ
አማኖራ ኢሲፌ አማኒያ ኡባሰ ጊዶ። 24 አርዮና ሲቆን ኑ ጎዳ
ዩሱሰ ኪሪሰቶሳ ሲቂያ ኡባራ ያሳ አዶ ከሃቴላይ ጊዶ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022

c35d6c73-3843-5482-b53e-7559d35deee5